

**Mara Evangelical Church
Seminar On MEC Mission Beyond Mission Golden Jubilee**

AWNANOPA PIZIE NATA MISSION
The Nature and Mission of the Church

Rev. Dr. L. B. Siama
May 27-29, 2016

1. Biehmiapa

Khazohpa bie pachuna eima pypa hawhta Mara Awnanopa cha eima reih a cheih leipa chipho hropazy lâta Thatihpha eima chhona cha kô 50 (1966-2016) a vaw tloh haw. Chavâta ABeipa lâta alyna bie eima reipa hawhta kô 50 chhoh mission eima chakaona dah chhao saipazi awpa âbyuh haw. Chakaona phapa zy cha hmiala liata hmâh pazao awpa ta takô hawhta chatâ via aw pita, chakao liata taozie panano byuhpazy panano aw pi ta, chhâ nata âhmie khao leipazy cha eima thy ba awpa âbyuh aw.

1-1 He paper liata “Awnanopa pizie nata mission” tahpa palasapa a châ. He paper ta âchhuah chaipa cha Mara Awnanopa ta mission eima chakaopa he Biehrai Pachuna hawhta eima ngiapâpa vata eima hria awpa a châ, tahpa palasa chaneina a cha. Chakaona liata Khazohpa bie siezie dopa (sound theology) hawhta eima chakao khiahta cha Khazohpa khokheina byhna chhao eima to via aw. Byhna eima to leipa chhao rai ta, Khazohpa Bie ta tao awpa a tahpa cha eima tao lyma thlaha awpa a cha, tahpa chhao palasa awpa a chhuah. Chavâta Awnanopa yzie, pizie nata mission yzie he pahnopasiana chôta, Thatihpha eima chhopazao lyma awpa ta he paper pachhohpa liata palasapa a châ.

1-2 Secion 2 liata Awnanopa pizie palasa cha ta, section 3 liata Mission nata Awnanopa azaona kyh palasapa a châ. Section 4 liata cha he paper saipazina chôta, MEC ta hmiala mission a chakaona liata khapazy he paryh awpa âbyuh tahpa zawpi ta ama reipahmaoh thei nawpa ta hiahrinazy taopa a châ. ABeipa ta he paper cha ano raihria chakaona liata baotuhpa a cha thei awpa he chârohptuhpa thlahchhana a châ.

2. Awnanopa pizie (The Nature of the Church)

2.1 Awnanopa cha Khazohpa hmosai piepa cha ta, Khazohpa Bie nata Thlahpa Pathaihpa tawhta sapapuapa a châ. Awnanopa vaw papisatuhpa cha Khizaw kyhpacha ta a Saw matlu pietuhpa Khazohpa (Zawhana 3:16),¹ ngiapâtuhpazy Biehmeihseih lâta chhihthapa ta Zisu pachupazy khâ ama thei lyma nawpa ta a Thlahpa Pathaihpa vaw tuahtuhpa (Zawhana 14:26),² Chavâta Awnanopa cha ano sasyh ta a vaw ypa châ leipa ta, Khazohpa Bie nata Thlahpa Pathaihpa ta a papipa, Khazohpa eih a châpa nata Ano hmosai piepa a châ. A pizie rairai heta chakao awpa ta papipa, awpa, tuapa, Khazohpa Bie nata Thlahpa Pathaihpa ta achâhkheina raihria awpa ta a hmâpa chhaichhi a châpa vata Khazohpa ta a tuapa MISSIONARY a châ.

2.2 Awnanopa ta athao no tawh tlaita Khazohpa Bie liata thahri thlapa nata âpahniehpa a châ. Cha hmô thai leipa Khazohpa Bie cha khizaw history liata hmô thei awpa ta a vaw phuahluah. Cha BIE cha

a. Zisu Krista liata/ta sapa lâta a vaw liepa Khazohpa cha ta, khizaw lâta a zupa ta chyhsa ta vaw pih ta, khaiipâpa ta y ta, pathyu heihpa ta a y.

¹ Zawhana 3:16 “Khazohpa ta khizaw kyh pachâ ngaita ta, chatanachata a Sawchapaw matlupa pie ta, ano cha ahyrai a ngiapâpa maih leidia leipa ta chhâzaw hrona tlaao ama hnei thei nawpa ta.”

² Zawhana 14:26 “Thlahpalôtuhsa, Thlahpa Pathaihpa, Paw ta ei moh ta a vaw tua awpa khata, cha chata ato cha pachu aw ei ta, nama hnohta ei reipa zydua a cha patheisa pathi heih aw ei.”

- b. Cha BIE cha Khazohpa chyhsazy ta pakah ta ama vaw reih/chho laih lymapa, Biehraï Parohpa nata Biehraï Thiehpä liata a thatih ama vaw ropa Zisu Krista tlai kha a vaw châ.
- c. Cha BIE cha Awnanopa ta a vaw châhkhei ta, biechhona ta a vaw pachu ta nahkhaoh ta ama vaw theipa Zisu Krista kha a châ.

Chavâta Awnanopa cha cha BIE a vaw ngiapâ ta ngâchhih kawpa ta ahnohpazipazy akaona a vaw châ. Mari hawhta, “ABeipa seichanô ei châ, na bie hawhta ei chô liata tlô se,” a tahtuhpazy akaona a châ (Luka 1:38). Chavâta Mari cha Awnanopa nata ngiapâtuhpä mopakha chyu ngiâna hawhta pachâpa cha ta, avâ liata Paw Khazohpa khohpa tao awpa ta awpa “unawh, sietanô nata nôzy” ama châ (Mathai 12:50).³

2.3 Khazohpa Bie tawhta a vaw ypa ngiapâna cha Thlahpa Pathaihpa raihria vâta palaiseihsapä ta a y. Thlahpa chhihthana leipa ta Zisu cha ABeipa a châ, tah theipa châ vei (I Kaw 12:3). Chavâta BIE nata THLAHPA he pachhah theipa châ vei.

2.4 Bie nata Thlahpa Pathaihpa raihria tawhta a vaw pihpa a châpa vata Awnanopa cha Miakha deipa, Pathaihpa, Khizaw kaoki pahlypa (Catholic) nata Apostol zy tawhta a vaw ypa a châ.

- a. Awnanopa papituhpa, chatlaituhpa, bie nata Thlahpa Pathaihpa ta chahrypabaotuhpa cha Khazohpa Pakha deipa a châpa vata Awnanopa Miakha deita a châ (Zhn 17:11, Eph 4:1-6).⁴
- b. Khazohpa cha Pathaihpa (Theithai 11:44-45), moleina nata pathaih leipa zydua pathaihsa awpa ta Krista a vaw tuahtuhpa a châpa vata Awnanopa cha Pathaihpa a châ.
- c. Khazohpa cha hrona zydua pakina, chyhsa to pachha ta Biehmeihseihpa pahnosa awpa ta a khohpa (I Tim 2:4), chanô chapaw, chi nata pho, chyhsa zydua pathlua leipa ta Bie nata Thlahpa hmâpa ta hrona pietuhpa a châpa vâta Khizaw kaoki pahlypa (Catholic) a châ.
- d. Khazohpa Bie cha hmiatua ta Apostol zy ta ama vaw châhkheipa tawhta eima vaw pahnopa cha ta, amo y liata Khazohpa Thlahpa pathaihpa a phuahluahna zawzi ta awnanopa a vaw duahta a cha. Chavâta Awnanopa cha Apostol zy daihti tawhta a vaw duahta pazao lymapa kha a châ (Eph 2:20, Biephua 21:14).⁵

2.5 Awnanopa pizie hluhpi a ypa hry liata mia 4 deita eima palasa aw. Chazy cha Khazohpa Chyhsa, Krista Pôhpa, Thlahpa Pathaihpa Achhyna o nata Akaona (Koinonia) zy a châ.

- a. Khazohpa Chyhsa

Khazohpa ta Abaraha cha ano chyhsa nata pho pathaihpa châta a tlyh. Cha tawhta pho tlypa tahpa ta hrohsopazy ta ama vaw reih lyma. “Kei he amo Khazohpa châ aw na ta, amo cha ei chyhsazy ama châ aw (Zer 31:33; Ezk 37:27).⁶ Chyhsa zydua pachha awpa ta Khazohpa ta chipho hruhpi hry liata chipho miakha cha a tlyh (Isai

³ Mathai 12:50 “Ahyrai ei Paw avâ liata khopa a taopa maih cha ei unawhpa nata ei sietanô nata ei nô ama châ.”

⁴ Zauhana 17:11 “Ei Paw pathaihpa y, nama ta kei ei na piepazy chi he na moh ta hrôhbieh mah y, pôhkha ama châ thei nawpa ta, keimo hawh hrana heta.”

Ephesi 4:1-6 “... pôhpa miakha nata Thlahpa miakha deita y ta, Abeipa pakha, ngiapâna miakha, batina miakha, ato Khazohpa nata Paw pakha deita y ta, ano cha ato chô liata y ta, ato chahryh khaiya ta, ato chô liata a y hräpa a châ.”

⁵ Eph 2:20 “Krista Zisu tlai cha a ki liata alô phahnai chaipa châpa ta apostolzy nata hrohsopazy lobo chôta a sapa cha ei chi ta.” Biephua 21:14 “Cha khihpi ku chata lobo mia 12 hnei ta, chazy liana chata Mietaku Taw apostol 12 mohzy a choh ta.”

⁶ Ezk 37:27 “Ei byuhreihzy chhao ama hnohta y aw ta, ama Khazohpa cha aw na ta, amo cha ei chyhsazy ama châ aw.”

49:1-6).⁷ Khazohpa ta mo pakha tawh pathaopa ta chipho miakha kha a aw. Chavâta Biehrâi ta Khazohpa Israel hmeihseihpazy (Kal 6:16), Chi atlypa, abei theithaipa sahlao, pho pathaihpâ, Khazohpa chyhsa (I Pity 2:9) tahpa ta a vaw reih.

b. Krista pôhpa

Awnanopa cha Krista pôhpa hawhta pachâpa a châ. Krista cha lâ hlapi liata a ypazy pahniapa ta azaona miah taotuhpa nata eima ryhna a châ (Eph 2:13-14). Pachiahpa zy likawh liata ahaona, ahryuna, khâkhaipa chana zydua Krista pôhpa miakha liata Khazohpa lâta aryhna taopa a châ haw; chavâta Krista cha luhpa châ ta, awnanopa cha a pôhpa a châ (Eph. 2:16, 1:23). Pôhpa liata pachiahpa zydua cha luhpa ta achhuahna pipatlohtuhpazy ama châ (Raw 12:5, I Kaw 12:12). Ngiapâna nata batina ta Thlahpa Pathaihpâ liana chata Krista pôhpa sahlaozy eima châ haw. Beipa Tlakhai chakaona heta pôhpa liata pachiahpa châna cha eima pathieh lyma tyh. Pachiahpazy liata hmosai piepa nanopazy he Khazohpa rônahna nata âchhuahna pipatlohsana châta piepazy ama châ (I Kaw 12:3-13).

c. Thlahpa Pathaihpâ Achhyna-o

Awnanopata Thlahpa Pathaihpâ Achhyna-o a châna cha chhòh lâta azaona yna liata a châ. Cha azaona dopa yna cha Pentecost nohta Thlahpa Pathaihpâ vaw tlôna liata â la. Thlahpa chata Awnanopa chhòh liata khâ a pahrâpa vata azaona hro cha pathieh lyma ta, hmotao zydua hrona chhao a taopathi lyma tyh. Awnanopa cha apostol nata hrohsopazy ta lôbô ama bô chiehpâ liata sapa a châpa vâta Khazohpa Chhòhkha o, Thlahpa Pathaihpâ pahrâna nata raihriana su chhao a châ hra. Chavâta 'Abeipa liata achhyna o pathaihpâ' (Eph 2:21-22), 'Theithaipa pathaihpâ châ thei nawpa ta Thlahpa lâ o (I Pity 2:5), Thlahpa Pathaihpâ hmotaotheina ta a châhkheina, thlahchhana, kyhpachana, raihriana nata chakaona su a châ.

d. Awnanopa cha Akaona a châ.

Awnanopa châna ngiâna miakha cha Akaona (koinonia) nata hmô theipa apôhkhana yna he a châ. Akaona cha alyuna hneina, piehla rairiena, ahlaohlina, hmaohkha ta taokhoh/hriakhohna, maohphaona lâkhei veichâhna, apahnokheina zy hawhpa he a châ. Biehrâi ta awnanopa moh hropa a bipa 'mietaku zaw' (Zhn 10:16), Krezôh (Zhn 15, Isai 5), Krista myuh (Biph 21:2), Khazohpa o (Heb 3:1-6), biehrâihna thiehpâ (Heb. 8:8-13) nata khihpi Pathaihpâ, Zerusalem thiehpâ (Biph 21:2) a tahpazy he Khazohpa nata a chyhsazy azaona, awnanopa chhòh liata pakha nata pakha azaona, ngiapâtuhpâ nata hmotaozazy likawh azaona phana kyh reina a châ. Chavâta awnanopa yna maih liata azaona phapa a y lyma aw.

2.6 Awnanopa Achhuahna (The Purpose of the Church)

Awnanopa âduana chhâpa he hmiatua ta awnanopa thatih tawhta achu theipa a châ.

Hmotaoapa 2:42-47

1. Khazohpa Achhyna (Worship) – Nohchareih ta palôhru miakha ta Khazohpa achhyna o liata ama y tyh (v. 46), Khazohpa ama reithai tyh (v. 47);
2. Akaona (Fellowship) – Hmaohkha ta y ei ta, a to a hly ei ta (v. 43), palôhru miakha ta y ei ta, (v. 46), ama o lâta viachha pachhaihpâ ta palôh tloh ngaitapa ta nie khoh tyh ei ta (v. 46), ama zydua alypa ta ama y (v. 47).

⁷ Isai 49:1-6 "Py chhòh tawhta ei moh a vaw reih haw; Zakaw phozy paduatuhpa cha ta, Zenitaizy pakhaisatuhpa ta a cha rao."

3. Chakaona (Service)– Ama ryu/sôhzy zuah ei ta, dyhchhiepazy ama pie tyh (v. 45), viachha ama pachhah tyh (v. 46).
4. Pachutuhpa ta Taona (Making - Discipleship)- Apostol-zy hmo nôh tao ei ta, zawpizy cha ta amo cha ama chiza ngasa. Apostlo-zy pachuna ry liata ama ypa heta hro pitlohna tao ta, Thlahpa lâta nôpawpazy china, zana a pahneisa. Pachuna phapa vâta deichhy angiahpazy ama deichhy thei (v. 43).
5. Thatihpha Chhona (Evangelism)– Nohchareih pachha haipazy baichhapa ta ama y (v. 47) heta cha awnanopa cha Thatihpha a chhona a cha zie a palasa kaw.

Mathai 22:34-40 (Biepie Rônah Chaipa)

1. Khazohpa nata Chyhsapa (vaihzy) tlokhuh Kyh pachâ awpa
2. Khazohpa kyh eima pachâna cha ano eima CHHYNA liata palasa awpa;
3. Kyhpachana cha CHAKAONA ta palasapa a cha (Ephe. 4:12)..

Mathai 28:18-20 (Raipie Rônah Chaipa)

1. Thatihpha chho awpa – Sie, pho to pachupa ta tao, Pachhana Thatihpha chho.
2. Akaona – Bati pachasa, Krista-Krista chhôhkha-Awnanoa chhôhkha akaona.
3. Pachutuhpa ta taona – Khazohpa khopa a taotuhpazy heta Krista bie ama zyh tyh. Chavata Pachutuhpa Taona (making-discipleship) âbyuh.

He biezy saina chôta Rick Waren ta a reipa hawhta Khizaw liata Awnanopa a duana chhâpa mia (5) a y. Chazy cha:

1. Khazohpa Achhyna (Worship)
2. Ngiapatuhpazy nata Akaona (Fellowship)
3. Chakao awpa (Service)
4. Krista Pachupa ta taona (Discipleship)
5. Thatihpha Chhona (Mission and Evangelism)

Awnanopa âduana maih liata he mia (5) he a y cheingei awpa a châ. Chakaotuhpazy ta a awnanopa thatlôna chaipa nata adadieh chaina kao ama pahno awpa a cha.

2.7 **Awnanopa Sawkhana (Forms of Church Government)**

Khizaw liata Awnanopa Mohôhna Sawkhana miah 3 a y. Chazy cha:

1. Episcopal Awnanopa Sawkhana
2. Prebyterian Awnanopa Sawkhana
3. Congregational Awnanopa Sawkhana a cha.

Episcopal Sawkhana (Episcopal Form of Church Government) cha Bishop biehneina ta a chhihthapa awnanopa sawkhana a châ. Roman Catholic, Anglican, Methodist nata Lutheran Awnanopa thokhazy ta bishop biehneina ta ama chhihtha. Ama biehneina dah awnanopa miakha nata miakha alyu khai vei. Atlahpipa ta bishop biehneina ta Awnanopa chhihthapa a cha (Mathai 16:18-19). Bishop cha biehneituh chaipa a cha. Chavata thokhazy ta, "Bishop leipa ta Awnanopa a duah thei vei" tah ei ta, thokhazy heih ta, "Bishop leipa ta awnanopa a duah thei ta, chahrasala cha hawhpa awnanopa cha a pha chaipa châ thei aw vei", ama tah.

Presbyterian Sawkhana (Presbyterian Form of Church Government) Awnanopa Machâ Ryureina ta chhihthapa awnanopa sawkhana a châ. Biehneina cha mo pakha

ku liata y leipa ta Ryureina liata tlaõ a y. Ryureina cha a chhâh chhâh ta a y – Local, Pastor Bia, Prebytery, Synod, Assembly tahpa ta. Awnanopa liata Krista bieheina cha Pastor nata Awnanopa Machazy tawhta hriapazipa a chhâ.⁸ Pastor zy bieheina cha bishop system hawhta ahnai asâh y vei. Awnanopa luhpa cha election ta a tlypa cha ta, hrochhoh chhata chhâ vei. He sawhkhana he Biehrai chhao â pykhei hra (Hmt 11:30; 20:17; 14:23; I Pity 5:1-2; I Tim. 5:17). Charles H. Cooley ta he hawhta awnanopa sawhkhana he chhohkha miakha liata a ypazy azaona hawhta a chhâ, a tah.

Congregational Sawhkhana (Congregational Form of Church Government) cha bieheina cha zawpi ku liata y ta, vyuhtuapa liata y vei. Zawpi ta luhpa ama tlyhpa vâta bieheintuhpa cha zawpi a chhâ (Hmt. 6:3-5,11:22,14:23,27;15:4; 2Kaw. 8:19). Biechhawhna (Hmt. 15:25); chhoreina (I Kor. 5:12), pachuna padopa thliena zy cha zawpi ku liata a y (I Zhn 4:1). Baptist, Evangelical Free Church, Congregational, Lutheran thokhazy, Menonites nata Independent awnanopazy ta he sawhkhana he ama hmâh. He sawhkhana he miano ta pachhah theipa a cha.

- a. **Autonomous local church:** Local church miakha heta amo avaona liata tlokhuh bie a hnei. A chhoh liata bieheipa y vei ei. Ama khopa pastor hrua thei ei ta, ama phie hei hra. Budget nata hmo hneipa chhao ama khopa hawhta ama tao.
- b. **Democratic local church:** Local church liata sahlao zydua ao ama hnei. Mo pakha ta ama chhoh liata bieheini thei vei. Awnaopa sahlao zydua biechhawhna liata tovyuh ama hnei khai. Luhpa ta ama tlypazy cha bieheintuhpa chhâ leipa ei ta, biepathlupazy hriatuhapa tlaõ ama cha.

3. Awnanopa Mission (The Mission of the Church)⁹

3.1 Awnanopa cha Khazohpa achhuahna pipatloh awpa ta hmâpa chhaichhi a chhâ. Cha achhuahna cha vamo chhaota Khazohpa Reithai palyupalih ta a rônahna paluahsa awpa he a chhâ. Khazohpa ta hmotaopa zydua cha Zisu Krista beichaipa ry liata syhpahmaoh awpa he a chhâ (Ephesi 1:10).¹⁰ Chavata chyhsa to ta Zisu Krista ângiapa thei nawpa ta Khizaw lâta hmosaipa ta piepa Awnanopa tuapa a chhâna (Mission of the Church) cha Khazohpa achhuahna Pipatloh awpa ta chakaona a chhâ (Zhn 17:21).¹¹

3-2 Zisu Krista cha ABeipa nata Pachhatuhpa chhata apyhpâ zydua cha Thatihpha he bie ta (pakah ta) nata hmotaopa ta phuah awpa ta awpa eima chhâ. Thatihpha athei beih leipa nata thei taraw ta a hrokhei leipazy lâta chho ta hrokhei awpa, khizaw liata Khazohpa ryureina mâ hnei zie nata phazie padisa awpa a chhâ. He chakaona mission he Awnanopa pizie rai a chhâpa vata tao lei thei lei awpa chakaona a chhâ. Cha cha Apostol zy daihti tawhta atanoh ta a y thla hâpa, Awnanopa cha Apohkhana, Pathaihna nata Catholic (khizaw kaoki pahlypa)¹² chhâna nata pachhah theipa chhâ vei. Chavata mission cha hmotaopa ta chakaona (practical action) a chhâ.

⁸ *The Constitution of the United Presbyterian Church in the United States of America* (Philadelphia: Office of the General Assembly of the UPC in USA, 1967), vol. 2, Book of Order, Chapter 9.

⁹ *The Nature and Mission of the Church*, Faith and Order Paper 198 (Geneva: WCC, 2005), 24-27.

¹⁰ *Ano abeina khonazie ta khizaw zydua Krista liata pakipa ta ypa ta, avâ liata nata alei liata hmo a ypa zydua ano liana chata sia pakipa chhâ nawpa ta.*

¹¹ *Ama zydua ta pohkha ama chhoh thei nawpa ta ...; nâ ta eina tua chi, tahpa khizaw ta ama zo thei nawpa ta.*

¹² *He miathopazy he Khazohpa chhâna palasana cha ta, mission deikua cha hrona ta tao awpa chakaona a cha.*

- 3-3 Awnanopa chata pachhana bieparupa nata chyhsazy hro panano/pathlaina cha ahmeihsehpa ta pachâsa awpa ta Krista Mission liata a hlaopa ta ato (chyhsapa nata hmotaopazy) zydua cha Khazohpa nata a paryh (reconcile) awpa a châ (2 Kawrini 5:1-21; Rawma 8:18-25).¹³ Cha aryhna chakaona cha Achhyna (worship), Chakaona (service/diakonia), Biechhona (kerygma), Akaona (fellowship) zy hmâpa ta pitlohna taihta ama chho awpa a cha. Cha cha Awnanopa Mission a châ.
- 3-4 Khizaw pachhana nata hro taopathina awpa liata Awnanopa ta Khazohpa khona liata maty châna taihta ama châhkhei leipa khiahta la, cha awnanopa cha a hrohpa awnana tah theipa châ vei. Chavâta Thatihpha bie eima chhopa he hmotaona ta achâhkhei ta chyhsa to lata molei rona, batina (Hmotao 2:37-38) nata ngiapâtuhpazy nata akaona hro liata y awpa ta hrua awpa âbyuh (Zawhana 10:10).¹⁴
- 3-5 Zisu Krista mission cha Khazohpa bie phuahna nata riethei sipasapazy mohôhna a châpa hawhta Apostol tawhpa paduapa awnanopa chhao cha biechhona, molei ro awpa ta hruana, ngiapâna, batina nata chakaona zydua chhao mission chakaona liata ama hria lyma tyh. Awnanopa ta cha chakaona cha ano châna (identity) hawh tlaita a vaw pachâ lyma hra (Mathai 25:31).¹⁵
- 3-6 Zisu Krista chakaotuhpa châna cha pasana taona taihta âhlaopa hawhta Awnanopa ta achâhkheina mission a hriana liata mo pakha tlyma, azaw ta tlyma maty châna taih chakao awpa a châ thei aw; cha cha Kraws lâthlôh châ tlôh ta (Mathai 10:16-22, 32-33).¹⁶
- 3-7 Awnanopa cha riethei pasaotaopazy reikhei awpa (advocacy), dyhchhiepa nata tovyuh ama chhupazy mohôh awpa ta awpa a châ. Chavâta chyhsa hro taopathi thei nawpa ta cha siana nata adona pakhâ theipa phu/py paduana zie (unjust structure) zy palasapa ta paryh awpa âbyuh. Awnanopa cha hnabeiseihna bie nata Thatihpha thlapalôhna bie zy cha thapasana nata zawngiahna raizy ta hria papua awpa âbyuh (Luka 4:18-19).¹⁷ Azaokhina raopa vâta hmia haona ta a pachhaihpa chyhsazy patlâh awpa nata paryh heih awpa ta Awnanopa cha awpa a châ (2 Kaw 5:18-20). Pakha nata pakha chô liata palôhphao pha hneipa ta chyhsazy deita châ leipa ta hmotaopazy taolâ ta hmâzie do leipazy chhao paryh awpa ta awpa a châ.

¹³ 2 Kaw 5:18, "Ato Khazohpa tawhta a puapa châ ta, ano chata Krista vâta ano nata a ryhpa ta a tao." Rawma 8:18-25 "Hmotaopa zydua chata hnabeiseih ngaitapa ta Khazohpa sawzy a vaw luahna cha a ngiahtiah leipa ta y thlah ha tlôh ei ta."

¹⁴ Hmotao 2:37-38 "Cha biezy cha ama thei nahta, ama pathipalôh a chhôpa hawhta vaw châ haw ta, ... Pity cha ta ama hnoh ta 'Ro ula, nama molei ngiahtai nawpa ta Zisu Krista moh ta bati chyuh teh u.' Zawhana 10:10 "Kei la hro ama hnei nawpa ta âkipa ta ama hnei nawpa ta âvyua ei châ."

¹⁵ Mathai 25:35 "Ei Paw ta byhna a piepa sai u, 'ei nodi ta namo ta niepa na pie ei chi ta, ei dâhphi ta dopa na pie ei chi ta, khichhai châ na ta na patlôsa ei chi ta, thluahruapa ta y na ta na pabusa ei chi ta, tlâh leipa ta y na tan a hmô ei chi ta, lô-o liata y na ta ei hnohta a vy ei chi ta," a tah aw.

¹⁶ Mathai 10:16-22 "Changie hry liata mietaku hawhta ei cha tuah ei;... Ryureihtuhpazy cha patusa aw ei ta, ama pakhyana-ozy liata ama cha tu aw,... thie awpa ta unawhzy ta unawhzy patusa ei ta, pawzy ta sawzy patusa aw ei ta, sawzy ta nôpawzy adyuh aw ei ta ama pathisa hra aw; ei moh vâta chyhsa to a haopa tau y aw ei chi ta, a chhana taih a taopa maih deikua cha pachhapa ta ama yaw

¹⁷ Luka 2:18-19 "Abeipa Thlahpa cha ei chôta y ta, dyhchhiepazy hnohta Thatihpha chho awpa, sei âtâhpazy hnohta puana, mochaopazy mopavâsana, taolâ taopazy puana nata Abeipa palôhtlâhna kô tlâh-awkhei awpa ta sathaw thupa ta tuapa ei châ," Bei Zisu ta a tah.

3-8 Thlahpa Pathaihpa hmotaotheina ta Awnanopa cha Zisu Krista pachuna zydua cha ngâchhih kawpa ta pachu lyma awpa ta awpa a châ. Cha ngâchhihna tahpa cha hmiatua ta Apostol zy pachupa hawh tlai ta, ngiapâna, hrona, nata achâhkheina he mo pakha tawhta pathaopa ta khizaw kaoki taih chho awpa a châ. Chavâta Awnanopa cha mo to châta Khazohpa kyhpachâna cha phuah ta, hrokheipa ta Krista mission cha ngâchhih kawpa ta phuah lyma awpa he a chakao awpa ta tuapa a châ.

3-9 Awnanopa cha khizaw châta Khazohpa achhuahna pipatlôh awpa ta hmâpa chhaichhi nata ngiâna a châ. Chavâta Awnanopa yna maih liata hmô thei leipa Khazohpa cha hmô theipa ta a y awpa a châpa vata Bei Zisu ta a hnohpazipazy cha “khizaw alô, khizaw khaihpa, nata tlâh laki liata khih a ypa” tahpa ta a aw (Mathai 5:13-16).¹⁸

4. Mara Awnanopa Mission chakaona saipazina

Awnanopa pizie nata a hria awpa mission kyh eima reih haw. Mara Awnanopa ta kô 50 chhoh Mission eima chakaona liata Biehraï pachuna hawhta eima hria/hria lei saipazi awpa âbyuh haw. He saipazina cha Hiahrina Achhpa heta eima saipazi awpa a pha aw.

4-1 Mara Awnanopa ta Thatihpha kô 50 tlai a vaw chho theipa he khapa vata e a châ? Eima nôpaw hmiatuapazy ta ama vaw chakaopa vâta ma? Sôh nata piah eima hneipa vâta ma? Mission hrialahpa eima hneipa vâta ma? Mission chakaona byhna tona hawh miakha hawhta eima pachâpa vâta ma? Mission chakao awpa miah pa y molosa l;eipa he khapa e a châ aw? Mission eima chakao vei khiah, kheita e eima y awpa na ngiapâ?

4-2 Secion 3:4 liata Awnanopa cha Miakha deipa, Pathaihpa, Khizaw kaoki apahlypa, Apostol zy tawhta paduapa a châ tahpa eima hmô haw. MEC ta Mission eima chakaona dâh he cha ngiapâna hawhta a châ ma? MEC ta chipho mopa ta chakao pi ta, chipho mia (7) ama ypa vata “Evangelical Mission mia (7) vaw y ha ta, rei leipa liata chazy cha Awnanopa phu/py mia (7) ta vaw duah ba aw. Chakhiahcha, MEC ta mission a hriana dah he Awnanopa phu/py pahluhsa lymapa mission châ thla ha vei ma? MEC maluh rona liata chhao eima pahlo thei leipa mission field zy tawhta ngiapatuhpazy he kheih hawhta eima mohoh aw? Kô 50 liata local church sianopa chhao y leipa ta, missionary zy mohôhna ry liata achhyhryh thita chakaona mission he kheita e na pachâ? Phu/py ky hela amo khona zie hawhta tlâ y ei sala, keimo la eima pangiapâsa tawh âdaih eima tah aw ma? Awnanopa miakha pachâsa leipa ta phy/py mia (7) pachâsapa mission chakaona he ado tlai aw ma?

4-3 Mission field liata Awnanopa achhuahna mia (5) hawhta eima chakao ma? Mission raihria liata Thatihpha chho pi ta, achhyna o sapa pi ta, Krimas patlôpa pi ta, khih thokha liata primary siku paduapa pi ta, he rakha he âdaih thlah ha ma? Awnanopa achhuahna mia (5)zy hry liata kheihawhpa he mission chakaona liata eima pha hla chai? Cha phalana cha kheita e eima pabie aw? Chazy saipazi nawpa ta hezy he ei vaw palasa.

¹⁸ Mathai 5:13-16 “Khizaw alô nama châ na; khizaw khaihpa nama châ na; Tlâh laki liata khih ypa cha nyuh theipa châ vei; Cha hawhna hra chata nama khaihna cha chyhsa mohmô ta khaih se, chatanachata nama hmo phapa taopa hmô aw ei ta, nama Paw avâ liata a ypa ama palyupalih thei aw.”

a. Khazohpa achhupa Awnanopa (Worshipping Church)

Chakaotuhpa (Pastor)	Achhyna Chhihthatuhpa
Ânuapa (Target)	Apakhypazy
Reihkâh hmâ viapazy	Khazohpa pahnona/ypâna, reithaina, thlahchhana, music, Thlahpa hmosai piena, hmotaotheina, ahrâna
Tlâh leina ngiâna	Apakhypa maluh chyhna, sôh thyupa chyhna, khihtlâh buana, tymana, aleihna, adyhryh leina, zyhna papeisa leina;

b. Akaopa Awnanopa (Fellowship)

Chakaotuhpa (Pastor)	Azaokhi thaipa Chhihthatuhpa (social leader)
Â nuapa (Target)	Awnanopa cha chhôhkha hawhta akao awpa
Reihkâh hmâ viapazy	Kyhpachana, thapasana, akaona, mohôhna, azaona, hmaohkha pati nie khohna, thlahchhana py
Tlâh leina ngiâna	Awnanopa liata chhôhkha rairuna a chho ngâh leina, thlahchha ahawna ngâh leina, meeting liata pachâna âlyu leipa biezy khôtho lâ liata rei tyhna, thapasana/kyhpachana hnei leinazy;

c. A Chakaopa Awnanopa (Service)

Chakaotuhpa (Pastor)	Khihtlâh/vaih taopathina a pachâpa chhihtuhpa
Ânuapa (Target)	Sahlao hry liata deichhy ângiah chaipazy
Reihkâh hmâ viapazy	Siana/adona, chieh leipazy deichhyna, chakao/baona, achuna kyh tiamana, Ngiâpâpa BIE khihtlâh liata hrokheina, sahpa angiahna liata pabie thei awpa.
Tlâh leina ngiâna	Khihsa rairuna liata deichhy thai leina, tlâh lei chieh leipazy vaih leina, bao ngiah/châkhei ngiahpazy uasa leina, Awnanopa ngabâh leina, piena kyh liata ria yna, khihtlâh kyh liata awnanopa âhlao awpa khoh leinazy;

d. Pitlohpa a taopa awnanopa (Discipleship)

Chakaotuhpa (Pastor)	Sahlaozy pachu ta hmo yzie pahmôsatuha
Â nuapa (Target)	Sahlaozy chakao thei awpa ta tobi awpa;
Reihkâh hmâ viapazy	Biehrâi Bie a pahnona, Thatihpha phuahna liata Expository, textual, Bible Study, Biehrâi reih Greek/Hebrew, doctrine, biehmeiseihpa, pachutuhpa pachâsa awpa ta châbu châsôh hmâpa ta.
Tlâh leina ngiâna	Biehrâi achhuahna châ leipa chyhna papypahlyna rakha ta sermon reina, chyhna pakha ngalâh raihria ta, zawpi rai hria leina, Bible study y leipa ta sermon ta awnanopa chhihthana, hmiala châta leadership pachhuahpanoh leina, leadership pha hlana, awnanopa chhihthana liata sasyh âchuna hnei leipa ta mohropa angahpachhâpa palôhru zy;

e. Thatihpha a chhopa awnanopa (Evangelizing church)

Chakaotuhpa (Pastor)	Evangelist
Â nuapa (Target)	Pachha châna apahno leipazy

Reihkâh hmâ viapazy	Krista achakheina, Thatihpha chhona, Thlahpa leidiapazy pachhana, Bati chana, o lâta chakaona, crusade, ahmâna, maihsa hmiakô liata ahlâna.
Tlâh leina ngiâna	Thlahpa thapasa leina, mission chakaona nata target liata pahâh leina, local liata pachha chana âpahno leipazy hluhna, Thatihpha chhopazy pasô leina;

4-4 MEC mission field liata awnanopazy sawhkhana eima siekheina dah he MEC Awnanopa sawhkhana hawhta a cha tlai ma? Misisonary nata pastor zy heta Episcopal hawhta chhihtha thla ha vei ei ma? MEC ta a siekheipa awnanopa sawhkhana hawhta siekhei thei awpa ta khapa e tao awpa abyuh?

4-5 Awnanopa cha Mission a chakao awpa a cha (section 2) liata eima palasa haw. Mission chakaona kyh liata theology dopa siekhei thei nawpa ta khapazy e eima ngiah chy. Mission chakaona liata riethi sipasapa nata tovyuh ama chhu hapazy reikheina, hmotaopazy pabohsana thatihpha, chyhsazy Khazohpa lata aryh heihna pahneisana kyh liata eima Awnanopa chakaona he na palôh a tlâhkhei thei ma? Cha hawhta pitloh viapa ta chakao nawpa ta hriatuhpazy kheita e eima tobi via aw? Sôh nata piah kyh liata kheita e mission local zy heta tha eima patlô aw?

5. **Biepachhâna**

Biehraï athaipa Emil Brunner ta, “Mei cha kê awpa he a chana dopa a châpa hawhta Awnanopa cha Thatihpha a chho awpa he a chana dopa a châ,” a tahpa hawhta Mara Awnanopa ta kô 50 tlai ta Mission a vaw chakao hawpa he a chana dopa hawhta a chakaona a châ. Chyhsazyh palyupalihna hlao awpa vata chakao leipa pi ta, Khazohpa ta miah a awpa vata tlao eima chakao. Eima hnei, eima tloh, eima thaipa vata chakao leipa pi ta, chakao awpa ta âhnawpa eima chapa vata eima chakao. Khazohpa ta mopakha tawhta pathaopa ta ano chakao awpa ta Israel phopi atlypa hawhta Mara Awnanopa chhao he Khazohpa pho atlypa a châpa vata eima chakao tah awpa a châ. Khazohpa ta Marapa chipho cha chipho hropazy pakhaihsa awpa miah a tlyh hawpa vata Abeipa lâta alyna bie hlâ ei suh u. Beipa Zisu ta Rônahna to lyma mawh sy!